

Gui'ch barojp bacaa San Pedr

Rxhiaal Béd xtiidx Dios loj ree bejn

1 Naj, Simón Béd, najn tijb xi apóstol Jesucrist rün tēen sirv lojman, cucas gui'ch guie par lējt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bēn rabēē bejn ree loj dol. ²Güünle' Dios lējt mazri, yabe'cdxe tēēman luxdoodi guial ma nūnbeedi laaman nē dux Dad ree Jesucrist.

Zi'c rayal gac ree xbejn Jesucrist

³Por xguialrniabee Dios ma baneeman gra ni rayaadx ree, din yaya'p ree guialnaban tiblayaa, yabajn tēē ree naya delant lojman, din ma naguieenbee ree Dios bēn gule dunuj ree guial ca'man guialrniabee naj tēēman benza'c. ⁴Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tēēdi tiblax gra ree ni ad rüjnt sirv nē ree ni mal riga' loj guidxliuj guie. ⁵Zeel gol been naguiejn por guialrliladx ni rajpidi gol gubajn zagdx, din guial guibandi zagdx, dxel mazri ma gagbeedi xhienaag guibandi.

⁶Abi' guial gagbeedi xhienaag guibandi, ma zajc gucwēēz xixgabmalidi, abi' guial gucwēēzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, ⁷dxel guial guibandi naya delant lojman, ma zajc guiēn lasa'di, abi' guial guiēn lasa'di, ma zajc guiēndi gra ree bejn.

⁸Bal yu'guijquidi nine ree cusnuu tēē cayüjndi naguiejn guibandi zian, dxel ad naban xlia'tzidi, ad beenbee xlia' tēētidi dux Dad ree Jesucrist.

⁹Per bēn ad rüjnt naguiejn guiban zian, laaman naj zi'c tijb bēnlutia'p o zi'c tijb bēn ad ruguiaat zijt, ma bayanladxaman guial biquied Dios xtolaman ni beenman guia'xchej.

¹⁰Zeel rnin lojdi, compniar raliduladx ree Jesucrist, zi'c ma bacaabee Dios lējt ma gulej tēēman lējt, gol been naguiejn gol guzudxi'ch loj xnejzaman, din bal sudxi'chidi, ad yayajbtridi loj dol.

¹¹Zian gapidi nejz nali din chu'di lod rniabee dux Dad ree Jesucrist tiblayaa, bēn babēē dunuj ree loj dol.

¹²Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tēēdi

ni diidxli ni ma bacaagdiajguidi.
¹³La'tgaj nabanun loj guidxliuj guie, naladxan rayal gunen consejw lojdi con ree diidx guin. ¹⁴Din por dux Dad ree Jesucrist ma gogbeen guial ma zidyob dxej yazaan loj guidxliuj guie.
¹⁵Zeel cayün da'tan naguiejn rnienë'n lëjt, din gusaaladxidi da diidxan majsi ma güjtan.

**Bén baguiaa ree
 xguialrniabee Jesucrist**

¹⁶Chi ranan lojdi xhienaag naj xguialrniabee Jesucrist xhie tëë naag gui'taman stijb, ad balëëgüijctan ni banan lojdi. Din con quijb du lojn baguiaan xbianiman ¹⁷chi biguien cha' Dios diizd xanyabaa, gulesaman xvaloraman baza't tëëman laaman zagdxe, rëbaman: “Xin guie naj da xi'nan, rënan laax rabaanë' tëën laax.” ¹⁸Abi' dunujn nayajc bën biguien cha' Dios diizd xanyabaa chi nadxu'në'n Jesús ruguia' zii, lod biguien xbianiman.

¹⁹Zianan zeel mazri raliduladxan ni rëb ree bën badëëd xtiidx Dios loj ree bejn, zeel zagdxe naj bal yu'guijquidi ni rëb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lëjt chaawlax cusnuu cayagbeedi xcwent Dios xt chi gui't Jesucrist stijb, bën naj bajl rusni par dunuj ree, dxel ma gagbeedi graczan zi'c tal najn. ²⁰Per gol gogbee guial ni'qui tijb xtiidx Dios ad zajct chignia' bejn por xixgabzaman. ²¹Din bën badëëd ree xtiidx Dios loj ree bejn, ad guneet reeman xtiidxaman zi'c goczi

xixgab reeman, gunee reeman ni basajb xSprijt Dios guijc reeman.

Bén rulüü ree diidx rusquiee
(Judas 4-13)

2 Zian zi'c guyu ree bën rusquiee loj ree bën Israel tiamp gulal rëb reeman rudëëd reeman xtiidx Dios loj ree bejn, ziangajc chu' ree bën rusquiee gulüü lëjt ni rusquiee ree, yaguiil reeman mod din gulüü reeman lëjt ni ad najt diidxli par gagdxadi. Ad zatiëjbt reeman nabee Jesucrist laa reeman, majsi baguijxaman xtol reeman, zeel ad zaglaat gunijt Dios laa reeman. ²Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. ³Abi' guial rzëëbladx reeman milia, yaguiil reeman xhie ni rusquiee gulüü reeman lëjt din tia' reeman xmiliadi, per ziangajc ad zalaat reeman loj xcasti Dios ni cabëz laa reeman, din diizd gocli mal yu' casti ni yayal ree bën rüjn zian.

⁴Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabëz reeman dxej güün xguialguxtisaman. ⁵Ad been tëëtaman perdon benmal guyu ree tiamp gulal, banijtaman laa reeman con nijs. Tijbzi Noé bën balüü xhienaag chinal ree bejn xnejz Dios, laazaman naj bën gulaa con zagajdx ree bejn. ⁶Ziangajc chi been xguialguxtis Dios con ree guiedx Sodoma në Gomorra, baze'caman laa reen xt bayajc reen cobdëj, abi'

laan naj ejempl par ree b́en guiban nadxuudx zi'c ree b́en guiedx zii ree. ⁷Per baslaa Dios b́en brii laj Lot, b́en guban zi'c ŕen Dios guyu t́eeman xgab guial baguiaaman zi'c guban ree benmal guin. ⁸Abi' guial gubajnman zagdxe, zeel guixie guixie guyunaya da'taman por ree nidxuudx biguiejnman baguiaa t́eeman been ree b́en guin. ⁹Rajc ŕijn Dios yudar b́en ruzoob ree xtiidxaman xhiet́eéz loj prueb cadéd reeman, abi' ma naj xhie gúinnéman benmal ree dxej gúin xguialguxtisaman.

¹⁰Laan naj ni yayal ree b́en naban zi'ctzi ŕen reeman, ad rént reeman nabee Jesucrist laa reeman, dád nad reeman, ad ratut reeman, ad rdxeb t́eét reeman rnieeguijdx reeman b́en naj ree xianjl Dios.

¹¹Abi' ni'qui ree xianjl Dios, majsi rajp reeman mazri gojl ńe guialrniabee, per achet diidxguijdx ŕeb reeman lojman contr laa reeman.

¹²Lasa' ree b́en guin naban reeman zi'c ree be, ad yu't xquiarguiejn reeman abi' rnieeguijdx reeman ni ad rignia't reeman, guidiblagaa ŕijn reeman ni réntzi reeman sin xgab. Zi'c ree be źeédzi reeb loj guidxliuj guie par guiniaaz reeb din guiét reeb, ziangajc laa reeman por nidxuudx ŕijn reeman ma cuséeb laagajc reeman, ¹³abi' yaguijx reeman gra ni ŕijnné reeman bejn ree. Rabaa da't reeman guial ŕijn reeman ni dxuudx ree, ni natu ree. Naj reeman zi'c tijb manch, ruxhiin reeman lanij ŕijnndi chi rawidi tijbzi, abi' rabaa da't reeman guial rusquiee reeman ĺejt.

¹⁴Ad zajct guguiaa reeman tijb b́engunaa sin guial ad źijnnt reeman xgabdxuudx, ad rucwéézt ŕijn reeman dol rusquiee t́eé reeman b́en ad rignia'za'ct ree xtiidx Dios din gúin reeman dol, abi' dád nasin reeman par gúin reeman gan ni rzéébladx reeman, laa reeman ma naj par yayal reeman xcasti Dios. ¹⁵Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam b́en badééd xtiidx Dios loj ree bejn, xi'n b́en brii laj Beor, chi guyénman ńijnman gan milia por ni mal ńijnman. ¹⁶Per chi zéman ziguiéenman ni mal guin, bacwéézt Dios laaman, basneeman xburaman zi'c tijb bejn, zian bacwéézt Dios xixgabtontaman.

¹⁷Yan b́en rusquiee cuzat reen lojdi naj reeman zi'c bizé ni ad yu't nijs, zi'c zaj ni ad nét guia, zeel rayal reeman lod nacay da't lod ad yu' t́eét dxej yarii reeman. ¹⁸Ganax ree diidx nabé rú reeman, diidx ad ŕijnnt ree sirv, ŕeb reeman guial achet gúunan guiban bejn zi'ctzi ŕenman, abi' zian rusquiee reeman b́en qui cusa'nri ree nejzmal. ¹⁹Réb reeman guial achut rayal nabee bejn, per ad rignia't reeman guial nidxuudx ŕijn reeman rniabee laa reeman, din graczi ni ad rajct rucwéézt ŕijn ree bejn, laan naj ni rniabee laa reeman. ²⁰Chi ma beenbee ree bejn dux Dad ree Jesucrist guial laaman naj b́en babéé dunuj ree loj dol ma basa'n t́eé reeman nidxuudx yu' ree loj guidxliuj guie, abi' rtiéjb reeman rniabeen laa reeman stijb, dxel piorli guiban reeman

guial chi gad reeman güünbee laaman. ²¹Zagdxeli naj ad nünbeet reeman xnejzaman, guial beenbee reeman laan abi' basa'n reeman xtiidxa'caman ni ma biguiejn reeman. ²²Con laa reeman rajc cumplid diidx ni rëb: “Rayaw bë'cw ni bayëbib, guiáad cüch qui gojzri con nijs naya rayub loj nizbajn.”

Ni gac chi gui't Jesucrist stijb

3 Gradi compniar raliduladx ree Jesucrist, rën da'tan lëjt, nine naj gui'ch rarojp rxhialan par lëjt. Loj grop gui'ch guie cayüan naguiejn ganenë'n lëjt din güüdi xgab zi'c rayal. ²Gol basaaladx ni rëb ree bën badëed xtiidx Dios loj ree bejn tiamp gulal, gol basaaladx tëe xtiidx dux Dad ree Jesucrist, bën babëe dunuj ree loj dol, xtiidxaman ni balüü ree apóstoles lëjt.

³Gol badxe'guijc, chi ma zidyob nit guidxliuj, chu' ree bën guze' lëjt abi' guiban reeman zi'ctzi rën reeman. ⁴Abi' na reeman lojdi: “¿Gon promejs been Jesucrist guial gui'taman stijb? Ma güjt gra ree dux béngulal ree, abi' graczi ni yu' loj guidxliuj guie sta naj gajc diizd chi gocchaaw guidxliuj.” ⁵Na reeman zian, guial ad rënt reeman yayagbee reeman guial diizd tiamp gulal mal yu' xanyabaa në guidxliuj abi' por xguialrniabee Dios brii guidxliuj guin loj nijs. ⁶Gojc xchej, dxel con nijs gajc baniyt Dios bën gocli ree. ⁷Per xanyabaa në guidxliuj raguiaa ree yan, ma naj guial guniyt Dios laa reen con bajl por xguialrniabeeman dxej ni güün xguialguxtisaman con ree bën ad ruzoobt xtiidxaman.

⁸Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej.

⁹Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

¹⁰Zi'c tal ri't tijb béngubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, guniyt Dios laa reen con bajl, në guidxliuj con gra ree ni yu' lojn, con bajl guniyt Dios laa reen.

¹¹Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios. ¹²Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii. ¹³Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

¹⁴Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaagloj Dios lëjt naya sin dol, riga'dxenë tëe lasa'di. ¹⁵Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bën rayën da't ree, ziangajc naman

lojdi loj ree xtiidxaman, zi'ctzi naj quiarguejn ni bazaladx Dios lojman. ¹⁶Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëég guial chignia' bejn, dxel bén ad rajtczi ree në ree bén ad zinalt xtiidx Dios con guidib luxdoo, ruchaa reeman ni rën guiëb xtiidx Pab, zi'cgajc rüjnnë reeman ni zëed ree loj xtiidx Dios, zeel laagajc reeman cusëeb laa reeman.

¹⁷Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëë güün ree bén rën ree gusquiee lëjt gan, chitëë gucwëéz sudxi'chidi loj xnejz Dios. ¹⁸Zagdxeli gol been naguiejn güünbeedi mazri dux Dad ree Jesucrist, bén baguijx dux tol ree, gol been tëë naguiejn gagbeedi mazri guial rën da'taman dunuj ree. Laaman rayal respejt gra tiampczi.